

# Jumlah pekerja formal dapat gaji bawah RM2,000 menurun

**Taburan upah Jun lalu catat 34.7 peratus berbanding 38.3 peratus 2022**

Oleh Mohd Zaky Zainuddin  
zaky@bh.com.my

Taburan upah pada Jun 2023 menunjukkan 34.7 peratus pekerja formal di Malaysia menerima gaji bawah RM2,000, mencatatkan penurunan 3.6 mata peratus daripada 38.3 peratus yang direkodkan pada bulan sama tahun lalu.

Ketua Perangkawan Malaysia, Datuk Seri Mohd Uzir Mahidin, berkata pada masa sama, kira-kira 7.9 peratus pekerja formal warganegara memperoleh gaji melebihi RM10,000.

"Sementara itu, analisis peratusan menunjukkan median (penengah) upah bulanan kumpulan penerima upah tertinggi sekurang-kurangnya lima kali lebih tinggi daripada median upah bulanan kumpulan penerima upah terendah dan seku-

rang-kurangnya tiga kali lebih tinggi daripada median upah bulanan kumpulan upah pertengahan.

"Tambahan pula, kategori pekerja dengan upah terendah mendapat peningkatan paling ketara 17 peratus dari tahun ke tahun pada Jun 2023.

"Ini menunjukkan median upah bulanan bagi kumpulan ini meningkat ketara daripada RM1,282 pada Jun 2022 kepada RM1,500 pada Jun 2023," katanya dalam kenyataan Laporan Statistik Upah Pekerja (Sektor Formal), Suku Tahun Kedua 2023 yang diterbitkan Jabatan Perangkaan, Malaysia (DOSM), semalam.

Mohd Uzir berkata, jumlah pekerja formal Malaysia pada Jun 2023 adalah 6.6 juta orang, meningkat 1.6 peratus berbanding bulan sama tahun sebelumnya.

Katanya, bilangan ini menyumbang hampir dua pertiga atau 64.3 peratus daripada jumlah keseluruhan bilangan pekerja bergaji warganegara dalam sektor formal.

"Pada masa sama, median upah bulanan pada Jun 2023 meningkat 4.9 peratus tahun ke tahun kepada RM2,600," katanya.

## Pertumbuhan positif

Memperincikan situasi upah mengikut negeri pada Jun 2023, Mohd Uzir berkata, semua negeri menunjukkan pertumbuhan positif tahun ke tahun dari segi median upah bulanan.

Beliau berkata, tiga negeri merekodkan median upah bulanan lebih tinggi berbanding median upah nasional RM2,600 iaitu Wilayah Persekutuan Kuala Lumpur mencatatkan median

upah bulanan tertinggi RM3,822, diikuti Selangor (RM2,945) dan Pulau Pinang (RM2,645).

"Bagaimanapun, Kelantan, Perlis dan Sabah mencatatkan median upah bulanan terendah masing-masing RM1,600, RM1,600 dan RM1,800," katanya.

Sementara itu, mengulas situasi upah merentasi aktiviti ekonomi suku tahun kedua 2023, Mohd Uzir berkata, sektor perlombongan dan pengkuarian, terutama mencatatkan pertumbuhan dua angka tahun ke tahun dalam median upah bulanan pada Jun 2023 kepada RM5,200, walaupun hanya mewakili 0.5 peratus daripada jumlah pekerja formal keseluruhan.

Katanya, semua sektor mencatatkan peningkatan tahun ke tahun bagi median upah bulanan pada Jun 2023 kecuali bagi sektor pertanian mencatatkan penurunan 0.9 peratus kepada RM1,927.

"Kumpulan umur mencatatkan median upah bulanan tertinggi pada Jun 2023 adalah 45 hingga 49 tahun yang menerima RM3,500.

"Kumpulan umur ini juga menerima median upah bulanan tertinggi pada April 2023 (RM3,582) dan Mei 2023 (RM3,482)," katanya.

**Kategori pekerja dengan upah terendah mendapat peningkatan paling ketara 17 peratus dari tahun ke tahun pada Jun 2023**

Mohd Uzir Mahidin,  
Ketua Perangkawan Malaysia

